

Ekwo-ozì, Pọlu Deru Nụ Ndu
Kọlosi

¹ Owa-a bụ ekwo-ozì, mụbe Pọlu ede. Mu bụ onye Chileke họtaru mee gẹ mu buru onye-ishi-ozì Kéreshi Jizọsu. Onye mu l'ìya gba mgba ede ìya bụ nwanna anyi, bụ Timoti.

² Ndu anyi ede ìya anụ bụ ndu kẹ Chileke; mbụ ndu ọphu nọ lẹ Kọlosi, bụ unwunna anyi ndu ọphu nọ l'ẹka Kéreshi.

Mu sụ gẹ Chileke, bụ Nna anyi yẹle Nnajiuphu, bụ Jizọsu Kéreshi meeru unu eze-ìphe-ọma; l'o mekwaapho g'unu buru l'ẹhu-guu.

Epfu anụ Chileke ekele ìya ekele

³ Anyi anọdujeepho ekele Chileke, bụ ìya bụ Nna kẹ Nnajiuphu anyi, bụ Jizọsu Kéreshi mẹ anyi -nọdu epfu opfu ẹhu unu anụ Chileke. ⁴ Noo l'anyi nụmawaru g'ekwekwe unu shihuberu ike l'ime Kéreshi. Anyi bya anụmaakwapho l'unu yeru ndu-nsọ obu g'ẹphe ha. ⁵ Kẹle unu ele ẹnya iphe, a kwakọberu unu l'imigwe; mbụ iphe ono, e meru; unu maru teke ono, a byaru bya ezia unu ozi-ọma ono, bụ ọkpobe-ọpfuno. ⁶ Ozi-ọma ono erekwa ire l'ẹkameka bya atụkoakwapho mgboko ejedzuru. Ọ buru ẹgube ono bụ g'o jedzuru ẹka unu nọ bya ere ire lẹ ndzụ unu e -shi mbọku, unu nụmaru ìya; o doo unu ẹnya ree; mbụ iphe, eze-ìphe-ọma Chileke ono bụ.

⁷ Ọo Epafurasu, bụ onye anyi yeru obu; onye anyi l'ìya tukuroru eje ọdu ozi lanụ bẹ bụ onye ziru unu ozi-ọma ono. Epafurasu ono bụ onye goshiwaru lẹ ya bụ onye e gude ire ìya ẹka l'ẹjeru Kéreshi ozi; ọ buru ìya nọ-chiru

ẹnya anyi l'ibe unu; ⁸ tẹme ọ bụru iya pfuru anyi kẹ n-yemobu unu ono, shi l'ẹka Unme-dụ-Nsọ ono.

⁹ Nokwa iphe, meru g'o gude ẹbe anyi atuwojeduru ẹka l'epfu anụ Chileke l'iswi ẹhu unu; g'o mee g'unu makọtajeru iphe, bụ uche iya; waa k'ọphu mmamiphe, shi l'ẹka Unme-dụ-Nsọ edoje ẹnya ree. ¹⁰ Ọo ya bụ g'unu emejekwanụ umere, l'e-me gẹ ndzụ unu l'ọphu bụru iphe, unu l'e-gude akwabẹ Chileke ùbvù; tẹme unu emekwaphọ iphe, dụ Chileke ree l'iphemiphe, unu eme ememe. Unu eshi ẹgube ono meje iphe, bụkpoo iphe-oma tekenteke; kakwaphọ amarweta onye Chileke bụ. ¹¹ L'o gude ike iya ono, dụ biribiri mee unu g'unu shihu ike ọkpobe esihu; k'ọphu unu a-duje ike gude ata nshi nwejeru obu l'iphemiphe, byaru unu. ¹² Unu egudejekwaphọ ẹhu-utso keje Chileke, bụ Nna ekele. Noo l'ọo ya bụ onye meru; unu bụru ndu gbaru g'unu lẹ ndu-nso gbarụ mgba l'iphe, ọ kwakọberu phẹ l'ẹka ono, bụ ìphóró dükota iya ono. ¹³ Ọ dzọtaru anyi l'ẹka ọchii nweru ike bya eworu anyi je edobe l'ẹka Nwa iya, o yeru obu bụ eze. ¹⁴ Ọ bụru iya bẹ e shi l'anwụhu iya gbata anyi; bya agụkwaarupho anyi nvụ l'iphe-ẹji.

Onye Kéreshi bụ mẹ iphe, oomeje

¹⁵ Ọo ya bụ ụgbugba Chileke ono, a ta ahụmajedu l'ẹnya ono; bya aburu iya bẹ Chileke doberu l'ọkpara l'iphe, bụkpoo iphe, o meru ememe. ¹⁶ Noo kẹle ọo l'ẹka iya bẹ Chileke shi mekọta iphe, bụkpoo iphemiphe, bụ ọphu dụ l'imigwe mẹ ọphu dụ lẹ mgboko; ọphu ẹnya ahụmajẹ mẹ ọphu a ta hụmadu l'ẹnya; mbụ ndu eze ojozi-imigwe; mẹ ndu bụ nnajịoha; mẹ ndu ọchi-ọha g'ẹphe hakọtakpoo; mẹ ndu ọphu nọ l'oke ọkwa, nọkota l'imigwe. Ọo yẹbedua, bụ Kéreshi ono bẹ Chileke shi l'ẹka iya mee iphemiphe kpọ; tẹme ọ bụru iya bẹ o

meru iya doberu. ¹⁷ Yẹbedua l'onwiya vukota iphemiphe uto dūhaadaa. O bukwarupho ike nkiya be o gude mee iphemiphe, Chileke meru ememe; o dukota l'eka Chileke doberu iya. ¹⁸ Oo ya bu ishi, kpofuru l'ogwehu iya ono, bu Chiochi. Oo yẹbedua bu eka ndzu l'ophu futaru. O bukwaru iya pho bu onye ivuzo, Chileke meru o shi l'onwu teta nodu ndzu; k'ophu ooburu iya akakota shii l'iphemiphe, Chileke meru ememe. ¹⁹ Oo Chileke be chiru iya l'obu iya mee g'oburu l'ehu Nwa iya be aa-huma-gbukpoo iphemiphe. ²⁰ Waa g'oo bukwarupho l'eka Nwa iya ono be ya e-shi mee ge ye iphemiphe, no l'imigwe me ophu no le mgboko du le ree. Ya eshi egube ono gude mee ono, Nwa iya gbashiru l'oswebe ono mee g'opfu ta aduheru yebe Chileke ye iphemiphe, o meru ememe.

²¹ Noo l'o nwekwarupho teke unubedua shi buru ndu anodu Chileke l'eka. O buru ejo-ipe unu shi anoduje ari l'oriri; eme iya l'umere be shi mee; unu buru ohogu Chileke. ²² Ole nta-a be Chileke shiwaa le ndzu, Nwa iya shi nodu l'elipe-a waa anwuhu, o nwuhuru; mee g'unu l'iya du le ree; k'ophu Nwa iya ono e-duta unu; unu aburu ndu duru Chileke iche; o to dudu ipe, aata unu uta iya; ophu unu abuduru ndu aamaru ejo eka jasu l'o duta unu bya apfube l'iphu Chileke ono. ²³ Ole ipe, unu mefutaje bu l'unu apfushi ike l'ekweta unu; kpoo onwunu g'abara; ophu unu ekwedu g'e mee unu g'unu wofu obu l'ipe ono, unu ele enya iya ono, bu iya bu ozi-oma ono, unu numaru ono, e zidzuru mgboko mgburugburu ono; bya abukwaru iya pho be Chileke ziru mbedua, bu Polu ge mu je ezia ndu ozo.

Ozi, Chileke ziru Polu g'o je ezia Chiochi

²⁴ Nta-a be ehuh atsokpoo mu utso; kele oo unu be mu ejedoru ipe-ehuka-a. Noo kele oo ipe-ehuka-a,

mu eje nta-a bẹ mu gude eyeta ẹka eme g'o dzukọta mbụ iphe, phọdukwaduru l'iphe-ẹhuka ono, Kéreshi jeru jedoru ogwẹhu iya ono, bụ Chiochi. ²⁵ Oo Chileke ono, bụ onye họtaru mu nụ gẹ mu bụru onye-ozì Chiochi bẹ ziru mu ozi gẹ mu zia unu; gẹ mu mee unu g'unu tuko iphe, ya pfuru makọtaru; ²⁶ mbụ iphe ono, o shi domia edomi eshinu o meru mgboko ono. O be nta o bya egoshi iya ndibe iya, dū nsọ. ²⁷ O bụru phẹ bẹ Chileke họtaru lẹ ya e-goshi iphe ono, nyiberu anyibe ono, e shi domia edomi l'ẹnya ndu abudu ndu Jiu ono, bụ iya bụ l'ì -nọdu Kéreshi l'ẹka; l'ì bụru onye e-mechaa gbua nwìnwii. ²⁸ Oo opfu ẹhu iya bẹ anyi anọduje asa kpaa kpaa g'onjemonye numa-a; alọ onjemonye ẹka lẹ nchị gude mmamiphe ezi iphe k'ọphu anyi e-me onyenonu g'ọ bụru onye nọ l'ime Kéreshi bụru onye dubebe ree. ²⁹ Noo g'o gude mu nọdu anọduje eseshi akanya ike; kukebe ẹhu eme gẹ mu e-me jeẹbe ozi ono, Chileke ziru mu ono. Ike, mu gude eje ozi-a bẹ bụ ike ono, Kéreshi eyeje mu l'ẹhu ono. Noo ike, l'ere ire l'ẹhu mu bụ onoya.

2

¹ Iphe, mu eme g'unu maru bụ lẹ mu ese akanya unu eseshi iya ike; mẹ akanya ndu Chiochi, nọ lẹ Layodeshiya; mewarto iphe, bukpo ndu ọzo, mu l'ẹphe teke ahuma-swee lẹ ndu-a. ² K'ọphu obu e-shihu phẹ ike; wafua g'ẹphe tuga bụru nanu lẹ n-yemobu; ọo ya bụ g'ẹphe abya amaẹbekporu okpobe-opfu ono; e-shi ẹgube ono iphe ono, Chileke shi domia edomi ono edoo phẹ ẹnya ree, bụ iya bụ kẹ Nna yele kẹ Kéreshi. ³ Oo l'ime Kéreshi ono bẹ Chileke domiru iphe, bukpo ẹku, dū lẹ mmamiphe yele nkwaanya l'ọphu.

⁴ Iphe, mu gude epfu iphe-a bụ k'ọphu o tọ dudu onye a-bya egude ire mecha mecha duswee unu ọzo. ⁵ Kẹle a

makwaru-a lẹ mu ta anọdu l'ẹka ono, unu nọ ono; ọle ọ kwa-a l'ẹka ono, unu nọ ono bẹ obu mu dọ. Iphe, atsoje mu uto bu g'unu gude mekoḅe onwunu buru nanu waa g'unu gude buru enwubata enwubata l'ekwekwe, unu kweru ke Kereshi.

Jizosu bu nnajioha

⁶ Oo ya bu; eshinu unu gbobewaru ẹka labo nata Kereshi Jizosu o buru Nnajiuphu unu; unu l'iya tugbaekwapho buru nanu kwaseru. ⁷ G'o bukwarupho g'oshi agbabeje ogbarabvu l'ime ali-a bu g'unu a-gbabe ogbarabvu l'ime Kereshi. G'o buru Kereshi be l'a-buru okpa-ulo, unu a-nodu akpu ndzu unu l'eli iya. Unu akabaa ekweta iphe ono, e ziru unu ono kweshia ya ike. Unu egudejeepho obu unu g'o ha ekele iya k'anyinyi.

⁸ Iphe, unu akwaberu enya bu g'o to du onye e-gude mmamiphe nwomaru-o-machata me ugho, enwedu ishi bya aturwua ekweta unu. Iphe ono bukota iphe, shi l'iphe, ndiphe ezi; bya aburu iphe, a toru okpa iya su g'e tsoje, bu iphe, eshidu Kereshi l'eka. ⁹ Noo l'oo l'ehu Kereshi ono, byaru bya aburu nemadzu ono be Chileke l'onwiya byaru bya edzua oke egoshikota onye ya bu. ¹⁰ Chileke be shiwaa l'eka Kereshi ono, unu l'iya tugbaru buru nanu ono mee ge ndzu unu dzua oke. O buru Kereshi ono bu onye-ishi, kakota iphe, bukotakpoo ndu ochi-oha imigwe g'ephe hakotakpoo; bya akakotakwapho ndu nokwapho l'oke okwa l'imigwe.

¹¹ Su-a; o kwa teke ono, unu l'iya byaru bya atugba buru nanu ono be e buru unu ubvu; mbu ubvu ophu abudu ẹka be e gude bua ya unu. Oo Kereshi l'onwiya bu onye buru iya unu. Ubvu ono, o buru unu ono bukwa ogwehu unu l'ophu be o yefuru unu g'onye yefuru uwe; mbu ogwehu unu ophu iphe-ẹji shi phawaa

kutukutu. ¹² Lẹ teke ono, e meru unu baputizimu ono bẹ a tũkoakwaru unu lẹ Kéreshi likọta elili. Tẹme Chileke tũkokwapho unu l'iya mee unu tũko shi l'Ọnwu teta dzuru ndzũ. Noo l'unu kwetarũ l'ike dũ Chileke bya achiru ọp̄fu ye l'ike iya ono; mbũ ike ọp̄hu, o gude mee Kéreshi o shi l'Ọnwu teta dzuru ndzũ. ¹³ O nweru teke unu shi nwũhu anwũhu kwaa l'ime iphe-ẹji unu; ọp̄hu unu ebuduru úbvù; ọle nta bẹ Chileke byawarũ emee; unu lẹ Kéreshi tũko nọdu ndzũ; ọ gũkotaru anyi nvũ l'iphe, bũkpoo iphe-ẹji, anyi meru g'ọ ha. ¹⁴ Ọ tũkochaa iphe ono, e deru edede l'ẹkwọ ono hushikọtachaa g'ọ ha; mbũ iphe ono, egoshi l'anyi darwũkotawaru iphe, ekemu iya pfuru, bũ iphe ono dũwaa g'ugwo, tọpyitaru anyi l'ẹkpiri ono. Chileke mechaa nno bya atũko iphemiphe ono kpọpyabe l'oswebe shi ẹgube ono mee ya o rebuhu ire. Ọp̄hu oo-rebaẹdu ire je adũwaruro ya. ¹⁵ Ọo teke phọ, Kéreshi nwũhuru l'oswebe phọ bẹ o chikpọru ike iphe, bũkpoo ọchi-ọha, nọkota l'ephekerephe; mẹ ike iphe, bũkpoo ndu ọp̄hu nọ l'oke ọkwa l'ephekerephe; kpua phẹ lẹ ndzũ kpufuta l'edzudzu-ọha teke ono, yẹbedua l'atũ okoo k'alwũ-gbu, ya lwũ-gburu phẹ ono.

¹⁶ Ọo ya bũ; g'ọ tọ dũkwa onye a-bya anọdu akpọcha-pheru unu mkpọcha l'iphe, unu eri eriri mẹ l'iphe, unu angũ angũngu. Ọp̄hu ọ dũkwa onye a-bya akpọchaaharu unu mkpọcha kẹ l'owaa iphe, unu abọje; g'unu dobekwa mbọku ọp̄huu bọje iya abọbo; ọzoo l'ọnwa fũkwaru k'ọphúú g'unu watakwa iya abọbo; ọzoo k'iphe, unu e-meje mbọku atũta unme. ¹⁷ Ekemu ndu Jiu ono g'ọ hakọta, e shi tũshia k'iphemiphe ono bẹ shi bũkotaru onyonyo iphe, l'e-mechaa mee l'iphu. Obenu l'ọp̄hu bũ ọkpobe iya bũ Kéreshi. ¹⁸ Ọo ya bũ g'unu te ekwekwa g'ọ dũru onye l'abya akpọshia unu anata obunggo ono, Chileke l'e-bu unu ono. Unu

b'ekwekwa gẹ ndu ono, ọonoduje atso uto l'ephe emeje g'a su l'ephe wozeru onwophe ali ono nafu unu obunggo Chileke. Epe anoduje epfu g'a bageru unwu-jozi-imigwe eja; epe asu l'iphe, epe gbaberu okpa epfu iya bu ophuleny, epe phuru. Egube ndu ono anodujeepho eku onwophe iphe, epe ahadu g'oo ya. O buerupho egomunggo, enwedu ishi be epe anoduje agba. ¹⁹ Epe ta anyatajedu l'o duru onye bu ishi, bu eka ogwehu dzepfuru le nkwo iya le nkwo iya; mekpoo akwara, dukota l'ehu. O buru ishi emeje ogwehu ono l'oovu evuvu ge Chileke tuberu.

Anwuhu waa eteta k'onye le Kereshi

²⁰ Su-a; eshi ophu unu le Kereshi tukoru nwuhukota be Chileke bofuakwaru unu l'eme iphe, ndiphe toru okpa iya, su g'e tsoje. ?Bu gunu meru g'o gude unu nodu emekwadu ge ndu bukwadu ndu mgboko-a; emekwadu iphe, ekemu pfuru, bu ophu suru: ²¹ "B'ebiyka eka le nri owa! B'edekwa owa-a ire; ophu i denyikwa ophu eka?" ²² Ipe, bukpoo ekemu ono g'o ha tukokwaru bukeru-a iphe, nemadzu ezi waa iphe, a toru okpa iya su g'etsoje. Noo kele iphe, eeri eriri bu e-richawa iya be o buwaru. ²³ Ipe ono, epe ezi ono adujekwa g'o shi le mmamiphe; bya aburu iphe, nemadzu gude eka kotaru onwiya; buru ndu eme g'a su l'ephe wozetaru onwophe ali; buru ndu anu ogwehu phe aphu. Ole iphemiphe ono ta adukwa ophu eyetageru phe eka g'ephe sede onwophe l'egu ejo-iphe, l'agu phe nu.

3

¹ Su-a; eshinu Chileke mewaru unu le Kereshi tuko shi l'onwu teta dzuru ndzu; unu chojenu uzo, unu eshi g'iphe ono, du l'imigwe ono rwube unu eka; mbu iphe, du l'eka ono, Kereshi no l'ekutara Chileke ono.

² Unu woru uche unu dobe l'iphe ono, dū l'eli ono; unu te ewoshiru iya dobe l'iphe kẹ mgboko l'ẹka-a. ³ Noo kẹle unu nwūhuru anwūhu. Ndzū unu bẹ Kéréshi wowaru domia l'ẹka Chileke. Kéréshi nọdukwanu l'ime Chileke. ⁴ Oo Kéréshi bẹ bụ ọkpobe ndzū anyi g'anyi hakọta. Teke ono, Kéréshi a-bya ọzo ono bẹ unu e-tsokwaru iya phọ bya. Unu l'iya agbarū mgba l'ọdu-biribiri iya.

⁵ Oo ya bụ; unu pyi-gbushia iphe, bukotakpoo iphe kẹ mgboko-a, bụ iphe, dzukwadu ndzū l'ẹhu unu, bụ iya bụ; apharwūshi onwonye; umere, rehuru erehu mẹ ẹgu eme ẹjo-iphe; iji-ẹnya mẹ ẹnya-pfurupfuru, bühukwapho agwa ọbvū. ⁶ Oo iphemiphe ono bẹ l'e-me g'oke-ẹhu-ẹghu kẹ Chileke dapfu ndu ta nūdu iphe lẹ nchị. ⁷ O nwekwarū-a teke unubẹdua shi emegbaa iphemiphe ono, bụ iya bụ teke ẹjo-iphe ono shi gudegbaa ndzū unu eme g'ọ dū iya.

⁸ Ole nta-a bẹ unu a-ha iphemiphe ono. Unu haa ẹhu-ẹghu; obu ọku; edoberu nwibe unu ẹjo obu; ephu nemadzū iphu. G'opfu erehu te eshijekwa unu l'ọnu. ⁹ Unu ta adzūjekwaru nwibe unu ụka; eshinu unu hakotawaru akahū umere ono yẹe ẹjo ememe, tso iya nū. ¹⁰ Oo ya bụ g'unu yee umere ọphúú ono g'onye yeru uwe. Ọ kwa Chileke ono, nūru unu umere ọphúú ono anọduje eme unu g'unu kabaa aburu ndu o meru k'ọphúú. Oo ya bụ g'unu amakotaru onye Chileke bụ; marwee ya amarwe k'ọphu unu a-nọdu akabaa adū g'ọ dū kwaseru. ¹¹ Eshinu ọ dūwaa nno bẹ a ta akpahẹkwa ishi kẹ l'onye ọphuu bụ onye Jiu; onye ọphuu bụru onye abudu onye Gurisu; onye ọphuu bụru onye buru úbvù; ọphu onye ọphuu ebuduru. Onye ọphuu bụ nlwamulwa; onye ọphuu bụru onye ime-ọswa. Onye ọphuu bụ ohu; onye ọphuu bụru amadu. Ọ bụwaa Kéréshi bụ mkpakọ lẹ nswikọ; tẹme o buru l'ime onyemonye.

¹² Unu bụ ụnwu Chileke. O yeru unu obu bya ahọta unu g'unu bụru ndu nkiya. Noo g'o gude unu je aphụjeru nemadzu obu-imemini; nwejeru obu ọmaa; unu wozeje onwunu alị; meje odoo; unu atajeru iphe nshi. Unu tuko iphe ono g'ọ hakọta chita yee g'onye yeru uwe. ¹³ Nwibe unu -mee unu ẹji; unu tagbuje iya ẹ nshi. Teke nemadzu meru unu iphe, unu a-ta onye ọbu uta; unu aguaru iya ya nvu. Nnajiuphu guakwaru unu nvu l'iphe-ẹji unu. Ọo ya bu; unu gujekwaru ndu ọzo nvu m'ephe meswee unu. ¹⁴ Ọphu kachakponu l'iphemiphe ono bu g'unu yee nwibe unu obu. G'ọ chikobe unu g'unu tugba buri nanu ọkpobe aburu. ¹⁵ G'ehu-guu ọphu shi Kéreshi l'eka nọdukwa l'obu unu; duzi unu uto; kele ọo ya meru g'o gude Chileke kukobe unu g'unu bya aburu ogwehu lanu. Unu keleje Chileke ekele iphe onoya.

¹⁶ Unu kwe g'opfu ke Kéreshi ono bya eburu l'ime obu unu dzua ya oke ẹ mmamiphe; ezi iphe; yele adu nwibe unu obu. Unu egudekwa iya pho aloru phe eka ẹ nchi. Unu guje ebvu-oma nu Chileke; me ebvu ekele; me ebvu ọzo, shikota Unme-du-Nso l'eka. Unu gude obu unu g'ọ ha meje iphemiphe ono; gude nno ekele Chileke ekele. ¹⁷ Iphe, bukpo iphe, unu epfu epfufu me iphe, unu eme ememe; unu gudeje epha Nnajiuphu, bu Jizosu Kéreshi mekotaje iphe obu. Mbua; unu shije Kéreshi l'eka kelekponephọ Chileke, bu Nna ekele.

Umere, ee-meje l'unuphu ndu ke Kéreshi

¹⁸ Unube unwanyi; unu wozejekwaru ji unu onwunu alị; kele ọo ya bu iphe, gbaru onye etso Nnajiuphu l'ememe.

¹⁹ Unube unwoke; unu yeje nyee unu obu. Unu ta adujekwaru phe ehuka.

²⁰ Unubẹ ụnwegirima; unu nùjeru ne lẹ nna, nwuru unu opfu l'iphemiphe, ẹphe epfuru unu. Noo l'ọo iphe, dū Nnajiuphu ree bụ ono.

²¹ Unubẹ nna; unu te emejekwa ụnwegirima unu iphe, e-ghu phẹ eghu; anọnya obu dahụ phẹ adzulakpa.

²² Unubẹ ndu bụ ohu; unu mejekwa iphe, ndu bụ nnaji unu k'eliphe-a ziru unu. Ọ tọ bụekwapho teke ẹphe ele unu ẹnya bẹ unu e-meje iya g'ee-shi g'aa-jaa unu ajaja. Unu gudejekpọepho obu ìphóró me iya. Iphe, unu azọbeje eme iya aburu lẹ Chileke duru unu lẹ nsọ.

²³ Iphe, bụ iphe, unu emekpọo; unu phubeje iphu me iphe ọbu maru l'ọo Nnajiuphu anyi bẹ unu emeru iya. Unu te emejekwa iya g'ọ bụ nemadzụ bẹ unu emeru iya. ²⁴ Unu nyatajekwa l'ọo Chileke bẹ l'e-bu unu obunggo iya, bụ iya bụ lẹ Nnajiuphu l'a-nụ unu iphe ono, o kwetarụ ndu nkiya ukwe iya ono. Noo kẹle ọo Kéreshi bụ Nnajiuphu, bẹ unu ejeru ozi. ²⁵ Ọle onye eme iphe-ẹji bẹ Chileke a-pfukwanu ụgwọ ọphu gbaru iya nụ; m'obeta onye ọbu buru onye. Noo lẹ yẹbedua, bụ Chileke ta adudu onye oole ẹnya l'iphu.

4

¹ Unubẹ ndu bụ nnajiuphu; unu mejekwaru ohu unu iphe, pfuru ọto mẹ iphe, rwuberu phẹ nụ. Unu nyatajekwa l'unubẹdua nwekwarupho onye bụ Nnajiuphu unu, bu l'imigwe.

Iphe unu e-meje

² Unu yemia ishi l'epfu anụ Chileke; unu eche nche; ekelejekpọe ya phọ ekele. ³ Unu pfujekwarupho opfu ẹhu anyi nụ Chileke sụ iya g'o mee g'anyi nwejeru ẹka anyi e-zije ozi-oma ono; mbụ g'anyi zije k'iphe ono, Chileke shi domia edomi, bụ iya bụ Kéreshi l'onwiya. Ọ kwa k'ozì-oma ono bẹ o gude a tụa mu mkpọro-a. ⁴ Unu

pfujekwarupho nū iya g'o mee mu gẹ mu dūje ike pfuje iya g'o doo ẹnya lẹ g'ọ gbaru mu l'epfufu iya.

⁵ Unu meje umere ndu maru iphe l'iphu ndu abudu ndu kẹ Kéreshi. Unu ta ahajekwa ọzo duru unu g'ọ laa kẹ mmanu. ⁶ G'opfu unu guje egugu; dūjeepho g'iphe, únú tsuru; k'ọphu ooheje ndu unu epfuru iya ihee angaberu unu nchi. Unubedua amakwanuru g'unu e-yejeru onyemonye ọnu l'opfu.

Ekele ikpazu

⁷ Tikikọsu e-pfukotaru unu gẹ mu eme ala. Yẹbedua bu nwanna anyi, anyi yeru obu; bya aburu onye-ozima, e gude ire iya ẹka; bya aburu onye anyi l'iya tukoru eje ozi ono. ⁸ Mu ziru Tikikọsu obu g'ọ bya ndu-unu bya akọoru unu g'anyi l'eme ala; teme l'oo-mekwaapho g'obu shihu unu ike. ⁹ Onye anyi tukoru yẹ l'iya ezi g'ephe bya ndu-unu ono bu Onesimosu, bu onye anyi yeru obu; bukwarupho onye goshifuakwarupho lẹ ya gbaru g'e gude ire iya ẹka; mbu Onesimosu k'ibe unu. Ephenebo ono a-kowaruro unu g'iphemiphe, du l'ibiya-a.

¹⁰ Arisutakọsu, bu onye mu l'iya tukoru nodu lẹ mkporo l'ekelekaro unu. Maku nodu ekelekwapho unu; mbu nwa nwune-nna Banabas. E zihakwaru nzi ẹhu iya; o rwua unu nchi. Teke o shitaru ọzo ibiya k'unu; unu goshijekwa iya l'ẹhu atso unu utso l'ọ byaru. ¹¹ O nodu ekelekwapho unu mbu Jizosu ono, eekuje Jiosutosu ono. Oo umadzu ẹto ono bẹ bukwadu ndu Jiu, tso mu eje ozi ono, anyi eje gude egoshi l'ọo Chileke bu eze ono. O buru phẹ bẹ anoduje adu mu obu.

¹² Epafurasu k'ibe unu ekelekwapho unu. Yẹbedua bẹ bukwapho onye ejeru Kéreshi Jizosu ozi. Oogudeje obu iya g'ọ ha phube iphu epfu anu Chileke l'ishi ẹhu unu epfushi iya ike. Gẹ Chileke mee g'unu ba akpojeru laa

azu; l'oomekwapho unu: unu amakotaru umere, gbaru onye ke Kereshi l'ememe okpobe amaru; l'oomekwapho g'o heje unu ihee emeekota iphe, du Chileke l'uche. ¹³ Mbèdua efpukpo l'onwomu su l'oosekpo akanya ehu unu eseshi iya ike; mekpoo akanya ehu ndu Layodeshiya; me ke ndu Hiyerapolisu. ¹⁴ Onye dokinta ono, anyi yeru obu ono, bu Luku l'ekekwaro unu. O ndu ekekewapho unu mbu Dimasu.

¹⁵ Unu keleru anyi unwunna anyi phe ono, no le Layodeshiya. Unu ekeleru anyi Nimfa me Chiochi ono, edzukobeje l'ibe iya ono. ¹⁶ Unu -guchaa ekwo-ozia l'ibiya k'unu; unu mekwaa ya g'o rwua ndu Layodeshiya eka k'ophu ephebedua l'a-gukwa iya pho. Unu agukwaapho ekwo-ozia ophu shi Layodeshiya. ¹⁷ Unu zia Akiposu le mu suru g'o kukebekwa ehu jebe ozi ono, e ziru iya g'o jee l'ozia ono, anyi ejeru Nnajiuphu ono.

¹⁸ Oo mbèdua, bu Polu gude eka mu ede owa-a nta-a gude ekele unu. Unu ta azohajekwa le mu no le mkporo. Ge Chileke meeru unu eze-iphe-oma. Nokwa g'o du.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d